

بِسْمِ اللَّهِ الرَّحْمَنِ الرَّحِيمِ

KHUTBA JUMMAH

HADHRAT MUHYI-UD-DIN AL-KHALIFATULLAH

Munir Ahmad Azim

04 Septembre 2015 ~
(19 Dhul Qaddah 1436 Hijri)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hadhrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite axé so Khutba lors:

هَذَا بَصِيرَةٌ لِلنَّاسِ وَهُدًى وَرَحْمَةٌ لِقَوْمٍ يُوقِنُونَ ﴿١﴾ أَمْ حَسِبَ الَّذِينَ اجْتَرَحُوا السَّيِّئَاتِ أَنْ
نَجْعَلَهُمْ كَالَّذِينَ ءَامَنُوا وَعَمِلُوا الصَّالِحَاتِ سَوَاءً نَحْيَاهُمْ وَمَمَاتُهُمْ سَاءَ مَا يَحْكُمُونَ ﴿٢﴾
وَخَلَقَ اللَّهُ السَّمَوَاتِ وَالْأَرْضَ بِالْحَقِّ وَلِتُجْزَىٰ كُلُّ نَفْسٍ بِمَا كَسَبَتْ وَهُمْ لَا يُظْلَمُونَ ﴿٣﴾

Haazaa basaaa-iru linnaasi wa hudaww-wa Rahmatul-li-qawmiyy-yuuqinuun. 'Am hasiballazii-najtarahus-sayyi-'aati 'an-naj-'alahum kallaziina 'aamanuu wa 'amilus-saalihaati, sawaaa-'am-mahyaahum wa mamaatuhum ? Saaa-'a maa yah-kumuun. Wa khalaqallaahus-samaawaati-wal-'arza bil haqqi wa litujzaa kullu nafsīm-bimaa kasabat wa hum laa yuzlamuun.

« Sa li ene illumination pour dimounes, ene guide et ene grâce pou dimounes avec conviction. Eski bane ki commette de mauvaises actions pensé ki Nous pou traite zot pareil couma bane ki ena la foi et faire de bonnes actions, ki zot la vie et zot la mort pou pareil ? Couma zot juge mal! Allah fine crée bane les ciels et la terre en toute vérité, pou récompense sak l'âme d'après séki li mériter et aucaine injustice pas pou faire zot. » (Surah Al Jathiya 45: 21-23)

Sa bane versets là c'est même trois versets de Surah Al-Jathiya (Chapitre 45) ki mo ti expliqué la semaine dernière et mo explication lors sa trois versets là pas encore terminer et par la grâce d'Allah, mo pé continuer aujourd'hui avec sa bane explications là.

La colère d'Allah pé déssane lors la terre, et c'est seulement bane ki faire repentance complet de tous zot bane péchés et zot vine sous refuge d'Allah, c'est zot seulement ki pou sappé de sa punition d'Allah là. Donc, la vie et la mort de bane bon dimounes pas capave pareil couma la vie et la mort de bane ki plonger dans le mal. Si ou envie vine sous refuge d'Allah, bé faire *Tawba* (repentance) pou tous ou bane péchés et présente ou sous refuge d'Allah. Si ou faire coumsa, bé

Allah pou crée bane tel qualités dans ou, de sorte ki bane dimounes pou fini trouver ki entre ou et zot ena ene distinction ki bien claire kot pas nécessaire même alle dans bane débats. Tous dimounes ki ena li yeux et ki envie trouver, bé certainement li pou trouve sa différence là. Maintenant couma pou trouve sa différence là, et ki traitement Allah pou faire avec bane tel dimounes ?

Satan pas approcher même avec bane dimounes ki ena ene tel *Imaan* (la foi). Maintenant sa la lutte ki nous ena tous les jours avec Shaytaan là, c'est ene la lutte ki pas pou fini aussi longtemps ki nous pas rentre sous refuge d'Allah. Ene dimoune ki gagne sa refuge d'Allah là, bé Shaytaan pas pou approché avec li parceki Shaytaan péna permission pou rentre sous refuge d'Allah. Shaytaan alle dans bane places kot li trouve ene espace vide ; c'est lerlà ki Shaytaan pose so lipié. Quand mo fine dire ki repentir de tout bane péchés, céki mo pé dire, c'est ki pas quitte le moindre l'espace vide pou Shaytaan, pas donne li le moindre terrain parceki dès ki Shaytaan mette so pas dans ene place, bé à ce moment là so pas mofinne là commence faire so l'effet et lerlà li grandi l'espace là li aller même.

Pou comprend sa bien, mo pou raconte ene anecdote ki mo fine tender dans le passé et ki ena connexion avec sa sujet là ki mo pé traité azordi là. Ene fois ene bédouin ti installe so la tente et li ti pé assisé là-dans. C'était la nuit kot ti pé faire extrêmement frais. Alors so chameau fine mette so la tête endans la tente là et fine dire bédouin là, ki guetter pé faire bien frais dehors, bé laisse au moins mo la tête rentre à l'intérieur. Alors, kan so la tête fine gagne sa chaleur intérieur là, li fine conner ki qualité plaisir ena là-dans surtout kan pé faire bien frais dehors. Lerlà li fine dire bédouin là ki mo li cou aussi attacher avec mo la tête, bé laisse mo li cou aussi rentré. Et doucement, doucement li fine faire so le corps aussi rentrer. Lerlà li fine dire ki maintenant ki mo licou fine rentrer, bé ki tort mo la patte ena. Alors li fine faire so deux la pattes avant rentrer. Après ene ti moment li fine dire bédouin là, ki ou conner ki mo lotte deux la patte là aussi ena droit, alors ti bon ki ou sorti afin ki mo lotte deux la patte rentrer.

Donc, c'est coumsa même ki bane mal faire zot espace. Ene fois ki ou donne l'occasion le mal pou rentrer, bé à ce moment là li pas pou quitte ou. C'est coumsa même ki Shaytaan attaqué. Maintenant, tous bane dimounes ki engagé dans le mal, nék si zot réfléchi lors zot l'état psychologique, zot guetté, zot pou trouver ki au début zot ti pé penser ki si nous faire sa ti mal là, bé ki différence li faire. Li ene zaffaire tellement simple et ordinaire. Mais ene fois ki ou fine commette sa zaffaire simple là, bé automatiquement ou pou commette et faire le prochain pas.

Dans le monde entier kan ou constaté commié habitués de la drogue ki ena, alors sa li bazé lors sa principe là même. Ena ene bane bandits et criminels ki envie gatte bane zenfants l'école et collègues, zot dire bane zenfants là nek goutte sa tiguitte là, nék gouter et dès ki zot prend sa premier goutte là, bé à partir de la même zot commence rode le prochain dose, zot commence rode encore. Donc Shaytaan vini dès ki li gagne le moindre l'espace. Pou bane ki commette bane péchés, ki plonger dans le mal, li très nécessaire ki zot lire sa *duah* là boucou, boucou même :

«Rabbana zalamna anfussana wa illam taghfir lana watarhamna lana kunanna minal Khasireen».

O nous Maître, nous fine fer nous-mêmes ditort et si To pas pardonne nous et pas gagne pitié lors nous, nous pou très certainement vine du nombre de bane perdants. (Surah Al-Arraf 7: 24)

Kan fine dire faire repentance pour toute sorte de péchés et vine sous refuge d'Allah, bé sans sa *duah* là li pas possible. Et sa la lutte contre Shaytaan ki fine commencé, so remède c'est sa même sa *duah* là. Sa c'est ene *duah* ki au début même de sa la lutte là, Allah (swt) Li-même fine enseigne Hazrat Adam (as).

Donc mazine bien ki kan ou faire zéffort dans supporte la religion d'Allah, bé à ce moment là Allah pou éloigne tous bane obstacles. Et ou pou réussi. Donc, sa la guerre entre humain et Shaytaan là fine commence de l'époque de Hazrat Adam (as) et effectivement li coumsa. C'est avec sa *duah* là ki Hazrat Adam (as) fine sorti victorieux et c'est ene *duah* ki Allah même fine enseigne à Hazrat Adam (as). Donc, azordi aussi, à l'heure de la lutte avec Shaytaan, sak dimoune pou bizin vine sous refuge de sa verset (*duah*) là, et tant ki ene dimoune pas lire sa verset là avec profondeur du cœur, bé li pas pou gagne aide d'Allah pou ki finalement li capave vaincre Shaytaan. Mazine bien ki si ou faire zefforts dans l'obéissance d'Allah et si ou faire zéffort pou la religion, bé Allah pou éloigne tous bane obstacles. Maintenant pou vine ene aide et ene support dans la religion d'Allah, bé c'est pas ene zaffaire facile. Avant tout, sa demande ene purification totale de ou l'intérieur afin ki ou vine parmi bane ki recevoir sa capacité et la force de la part d'Allah pou vaincre sa bane Shaytaan ki à l'intérieur de ou et aussi saki dans ou l'environnement. C'est kan ou fer sa *Jihâd-e-Akbar* (le plus grand *Jihâd*, le plus grand la guerre) avec ou-mêmes kot ou touye ou *nafs* (égo et passions) ki ou pou capave vine prêt pou vine ene aide précieux pour la religion d'Allah. Au contraire sa la guerre ki ou fer avec Shaytaan là, c'est ene moyen ki aide ou pou atteindre la purification totale.

Donc n'importe ki dimoune ki azordi dans so le cœur li ena ene enthousiasme pou aide et supporte la religion d'Allah et malgré so l'état et so situation, malgré ki li ena boucou de faiblesses et li plonger dans quelques mal, si vraiment li ena sa l'amour là et si sincèrement li pas tire aucaine prétexte ; faudré pas ki li dire : « Moi kot mo été, couma ene dimoune couma moi capave présente li pou servir la religion d'Allah ? » Au contraire, si nék li rémette li à Allah et li dire: « *Ô mo Maitre tout céki mo ti ena, tout mo capital mo fine confier à Toi, c'est Toi maintenant ki capave mette To bénédiction là-dans et fructifier bane travaux de la religion avec sa, et aide moi pou donne encore dans To chemin. Par To grâce et To faveur, mo fine faire céki mo ti ena pou faire, car c'est mo devoir pou dépense dans To chemin de saki Toi-même fine accorde moi et mo pas peur la pauvreté car mo conné ki zamais To pou abandonne moi kan mo fine remette moi et mo bane dibiens dans To chemin.* » Très certainement Allah aide sa qualités dimoune là. Si ou faire des zéfforts dans l'obéissance d'Allah et si ou faire zéfforts pou supporte la religion d'Allah, bé Allah pou éloigne tous obstacles. Bane obstacles ki ena dans le chemin et ki ou même fine crée, et ki empêche ou approche d'Allah, tout sa bane obstacles là pou enlevé par Allah. Et lerlà ou pou réussi. Kifer li coumsa?

Parceki en fait, à ce moment là ou fine vine ene plantation d'Allah. N'importe kan ou faire sa promesse kot ou pou présente ou au service de la religion d'Allah, bé lerlà ou vine digne pou vine parmi bane plantes pures dans le jardin d'Allah. Et kan à bane piquants ki ena tout autour ou, zot pé gâte ou, zot pé influence ou la santé, zot vine bane obstacles dans le chemin de ou succès. Bane succès ki aux yeux d'Allah ou bizin gagner, ou mérité gagner, sa bane piquants là vine ene obstacle et li empêche ou gagne sa bane succès là. Mais kan ou vine ene support dans la religion d'Allah, bé à ce moment là Allah faire même traitement are ou pareil couma Li faire avec bane bon dimounes. Li éloigne ou bane obstacles, et ou vine ene tel dimoune ki Allah même pou protège ou et Li pou tire tous ou bane mauvais et jette en dehors. Bane mauvais ki ti dans ou l'intérieur et ti pé mange et boire disang de ou bane *Néki* (bons actions) et alors li vine le devoir d'Allah pou retire tous sa bane mauvais là, jette dehors.

Donc kan Allah faire sa traitement là avec ene dimoune, bé li couma dire ene très joli plante ki émerger, ene plante de bane *Néki* (bonne actions), ene plante ki rapporte bane fruits et Allah protège li et sappe li de toute sorte problèmes et ditorts.

Donc mo Khutba lors sa sujet là pas termine là-même, et Insha-Allah, mo pou contigne li vendredi prochain. *Insha-Allah*, ki Allah donne moi *Tawfiq* pou donne zot bane tel explication ki facile pou zot comprend et ki zot mette li en pratique afin ki zot récolter le plaisir d'Allah. *Insha-Allah. Ameen.*